



STINAPA TA INFORMA

PASEO DI KUEBA

Un di e kosnan mas atraktivo den skirbi artikulo pa e kampaña "NOS TA BIBA DI NATURELESA" ta ku bo ta haña sa kos di bo isla ku di otro manera lo bo no a haña sa fásil. Tuma por ehèmpel e kuebanan di Boneiru. Ora bo ta kana den naturalesa bo por blo riba entrada di un kueba. Esei a yega di pasami tambe. Pero pa mi drenta sin mas den un di e kuebanan ei mi so no tabata atraktivo pa mi. Pero ya ku mi kier a skirbi tokante nan, ma haña mi ta hasié tòg pa mi sa di kiko mi ta skirbi. P'esei mi a buk un trep asina serka un guia di kueba. Ela bisami pa bin ku bon sapatu i kos pa landa pasobra e final di e paseo tabata un landamentu i snòrkelmentu den un kueba. Tin masoménos 200 kueba registrá na Boneiru, pero ta 4 so ta aksesibel pa turista. Mi sa di e 'Grot van Hato' na Kòrsou ku e tin pidanan pa kana di semènt i iluminashon di koriente. P'esei mi tabata pidi pa mi haña mes un kos akinan tambe. Pero nada di esei. Pa bo drenta den un di e kuebanan di Boneiru, bo tin ku baha pokopoko for di baranka, baha for di un trapi haltu òf un kabuya. Bo tin ku baha alrededor di 30 meter asina! Esei sí m'a resistí kontra dje. Pa subi bèk mi tabatin poko miedu. Unabes den e kueba mes, bo mester lusa ku un flèshlait pa bo no slep ni dal bo kabes den un di e tantísimo barankanan den bo kaminda. Ta opvio ku un trep asina no ta pa tur hende. Un hende ku no ta kana bon òf ta sufri di kloustrafobia por bien lubidá. Pero di otro banda un trep asina bou di guia ta bale la pena. Ora bo ta den e kueba bo ta mira tur sorto di kos fantástiko. 'Stalagtit' (baranka ku a forma dor di awa di kalki ku ta sipel for di 'plafònt'), i 'stalagmit' (baranka ku a forma dor di awa di kalki ku ta lèk riba suela). E barankanan aki ta forma mayoria biaha riba otro i ta forma den un proseso ku ta tuma hopi siglo. E klímaks di e trep tabata e landamentu i snòrkelmentu. Ta un eksperensha úniko pa landa - ku hopi kuidou pa motibu di tur e barankanan rònt di bo - pasa den un sistema di 'gang' bou di awa. E awa ta dushi i tin kabaron chikitu ta landa rònt di bo. Raton dj'anochi ta kologá na e barankanan riba do kabes. Ta hopi ketu i bo ta kere ku bo ta den un otro mundu. Naturalesa di Boneiru ta úniko. Tambe bou di tera. Skirbí pa *Trix van Bennekom*, tradusí pa *Marcel Nahr*.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURELESA



Traha huntu na un desaroyo duradero pa Boneiru